




Politička organizacija građana "Naša stranka"
Branilaca Sarajeva 5/1, 71 000 Sarajevo
Telefon: 033 408 888; Fax: 033 408 881
E-mail: nasastranka@nasastranka.ba
Web: www.nasastranka.ba

Edin Forto

Zastupnik u Skupštini Kantona Sarajevo

Broj: 096 /16

Sarajevo, 22.07.2016.



Dostaviti:

Bosna i Hercegovina
Federacija Bosne i Hercegovine
Kanton Sarajevo
Skupština Kantona Sarajevo
n/r sekretar Skupštine Kantona Sarajevo

Uputiti: Ministarstvo saobraćaja

PREDMET: ZASTUPNIČKA INICIJATIVA – Uvođenje pametnih parkinga

Poštovani,

Na osnovu člana 106. Poslovnika Skupštine Kantona Sarajevo ("Službene novine Kantona Sarajevo", broj 25/10, 14/11, 19/11, 7/12, 26/12), upućujem zastupničko pitanje prema Ministarstvu komunalne privrede:

Pokrećem inicijativu da se sva nova parking rješenja, uključujući i ona koja su već isplanirana, realiziraju na bazi savremenih informaciono-komunikacionih rješenja „Smart Parking“ (pametni parkinzi), a koja omogućavaju dobijanje informacije o slobodnim parking mjestima u realnom vremenu, putem web aplikacije na mobilnim telefonima/računarima, te navođenje vozača prema željenom parkingu (čak uz mogućnost rezervacije slobodnog prostora). Tražim od ministarstva saobraćaja da finansijska sredstva planira u budžetu za iduću godinu, te da pokrene aktivnosti traženja finansiranja ovog projekta od strane Evropske Unije.

Uvod

U maju ove godine na sjednici Općinskog Vijeća Ilidža, vijećnik Naše stranke Elvis Vreto pokrenuo je inicijativu da se sva nova parking rješenja na Općini Ilidža realiziraju na bazi savremenih informaciono-komunikacionih rješenja „Smart Parking“ (pametni parkinzi) koja značajno rasterećuju saobraćajnu gužvu.

S obzirom na činjenicu da se cijeli Kanton Sarajevo svakodnevno bori sa saobraćajnim gužvama i nedostatkom slobodnih parking mjesta, ukazuje se potreba da se izgradnja novih i adaptacija postojećih parkirališta na cijelom kantonu planira po uzoru na uspješna iskustva zapadnoevropskih gradova - u smjeru izgradnje pametnih, održivih gradova.

Opis rješenja pametnog parkinga:

Na svakom parking mjestu instalirani su mali senzori (koji se napajaju iz vlastitih baterija sa dugim životnim vijekom). Senzori registruju da li je vozilo parkirano na tom parking mjestu ili ne. Ove informacije se korištenjem wireless (WiFi) mreže prikupljaju i dostavljaju vozačima putem jednostavne web aplikacije koju vozači koriste na svojim mobilnim telefonima/računarima. Također, na značajnim raskrsnicama i duž saobraćajnica postavljaju se digitalni paneli na kojima se u realnom vremenu prikazuje informacija o broju slobodnih parking mjesta u svakom području općine/centra, čime se pruža podrška vozačima bez pametne tehnologije.

Pametna parking rješenja omogućavaju da vozači na svojim mobilnim telefonima/računarima raspolažu i informacijama o cijenama parkinga i posebnim tarifnim uvjetima. Tarifni plan je moguće prilagođavati prema aktuelnim zbivanjima u

općini ili odgovarajućem godišnjem dobu ili prazniku. Moguće je da se ova rješenja koriste za sigurnosni nadzor na odgovarajućem parking prostoru, kontrolu prekršaja i detekciju neregistriranih vozila

Implementacija ovakvog rješenja je skalabilna u pogledu potencijalnih mogućnosti instaliranog sistema, što ostavlja prostor za postepeno planiranje i finansiranje obima rješenja.

Prednosti implementacije pametnog parkinga:

- Brže pronalaženje slobodnog parking mjesta i planiranje mjesta ulaska u grad/općinu
- Smanjenje saobraćajne gužve (nema uzaludnog kruženja u potrazi za parkingom)
- Povećanje sigurnosti vozača i pješaka na ulici (vozači nisu okupirani potragom za slobodnim parking mjestom)
- Redukcija emisije CO₂, tj. smanjenje zagađenosti zraka, te smanjenje buke u centralnim dijelovima mjesta (zaštita okoliša)

Realizacijom projekta Kanton Sarajevo postaje začetnik implementacije rješenja „pametnih gradova“ i prvi praktični primjer na BiH prostorima kako se primjenom tehnologije može stvoriti ugodniji svakodnevni život građanima, te unaprijediti turistička ponuda, jer će Sarajevo dobiti višu ocjenu po pitanju saobraćajne infrastrukture.

Potrebno je napomenuti i da bi cjelokupni projekat mogle odraditi firme iz sektora informacijskih tehnologija koje djeluju na području Kantona Sarajevo.

S poštovanjem,



Edin Forto

Zastupnik u Skupštini Kantona Sarajevo
Naša stranka